

BoBario: Fin na deterioro



ARUBA den un forma extraordinario a deshaci su mes di e crisis mundial. Esey ta bisto: E isla ta pasando den cambianan grandi y remarcabel. Deterioro a traha lugar pa bunitesa.

Prome Minister Mike Eman ta papia riba e pakico di un programa di mehoracion di bario; BoBario: Fin na deterioro. “Nos ta hopi satisfecho cu e proyecto BoBario. Nos no ta mira solamente barionan cu ta birando mas bunita, pero nos ta mira tambe cambio den e hendenan”. Prome Minister Mike Eman ta entusiasma di e exito di e fruto di su pensamiento, Plan BoBario cu ta trece bek e cohesion social bek cu antes tabata algo masha comun.

“Tempo cu mi a lanta, mi mama tabata mester a carga e responsabilidad di 8 yiu su so. E besindario a duna un man. Asina ami tabata haya bijles por nada di un juffrouw di scol cu tabata biba den nos caya”. Eman a subraya cu no t’e intencion pa bay bek den pasado. “Nos ta biba awe den un otro sociedad. Hendenan tin otro ambicion awor y riba nan schouder tin un otro presion cu antes. Loke nos kier ta enfora relacionnan social. Nos kier logra un comunidad cu ta conbibi cu otro y no uno cu ta biba banda di otro”. E pensamiento tras di proyecto BoBario ta pa mehora e calidad di bida di cada ciudadano. P’esey a scohe un metodo amplio cu e casnan di famia como punto di salida.

Eman ta splica: “Cada famia tin su propio becindario fisico cu ta consisti di e cas mes, e cayanan y espacionan publico. Famianan tin di haci tambe cu situacionnan social, manera entrada, bisiñanan y otro relacionnan social”.

Gabinete Mike Eman ta aspira pa cu BoBario mehora e cohesion entre hendenan, jong y bieu, pover y rico, studia y menos studia. E enfoka ta pa restaura barionan cu ta den estado di deterioro. Na Yuwana Morto esaki a wordo intensivamente haci. E casnan a wordo renoba completamente. E cayanan a haya asphalt y a bin acera, luga di para auto y plenchinan. E pone iluminacion y riba e daknan panelnan solar. Bou di un gazebo grandi e habitantenan ta topa otro pa organisa actividadnan di bario.

“E ambicion no ta pa bisa e hendenan con pa biba, pero si pa haci posibel cu e hendenan ta biba den un bario agradabel. Nos ta mira cu esaki ta funciona. Nos a crea e circunstancianan, pero e hendenan mes mester haci e resto. Y esey nan ta haci cu masha entusiasmo.

E habitantenan di Yuwana Morto a lanta un comis-

ion di bario cu tin cu percura cu e espacionan publico keda bunita. Ta organisa actividadnan dor di cua semper tin hende bou di e gazebo. E hendenan ta biba mas pafo awor cu no tin tanto stof mas ya cu e caminda di santo no t’ey mas. Esaki ta pone cu tin mas bida social. E hendenan ta mas involvi cu otro y esey ta loke nos kier a logra”, Eman a bisa.

E exito di Yuwana Morto ta wordo plama riba henter Aruba. “Nos kier esaki pa mas tanto bario posibel, asina Eman a expresa su ambicion. Den algun bario ta trahando duro riba e cambianan. Den algun caso, manera Juwana Morto, un renobacion grandi tabata necesario. “Pero tin biaha esaki no ta ni necesario. Nos tin barionan di clase medio na unda pone asphalt y optimalisa e iluminacion di caya tabata bastante caba. Hendenan ta biba den e barionan aki. Nan no por a ni sinta riba nan veranda dor di e stof di e camindanan di santo. E muchanan no por a hunga pafo, pasobra cu e mayornan no por a tira un bista riba nan. Asfalta e camindanan a resulta un exito grandi.

E habitantenan ta biba hopi mas pafo awor, ta topa otro mas y ta haci mas cos hunto. Dor di e iluminacion nan ta sinti nan mes mas sigur y ta sali pafo mas den oranan di anochi. Nan bida a haya un cambio pa mihor’ Eman a bisa.

N’e momentonan aki ta trahando den mas di 27 bario den e proyecto BoBario. Algun proyecto ta cla caba of ta den nan fase final. Na otro lugarnan ta trahando riba e plannan of ta bezig cu destaho publico.

BoBario ta mas cu solamente structuranan fisico. Team BoBario ta organisa actividadnan deportivo, manera ‘pannabol’. Tambe tin anochinan di cine y otro actividadnan. E intencion ta pa Team BoBario yuda e bario bin bek riba pia pa despues laga e habitantenan mes organisa e actividadnan.

“Nos ta mira cu esaki ta traha. Comisionnan ta wordo lanta den e barionan. P’e temporada di fin di aña algun di e barionan a yuda dorna e rotondenan. E meta di BoBario ta pa haci e hendenan mas entusiasma di nan mes, nan famia y nan futuro. Poco poco pero sigur nos ta bayendo den e bon direccion”.

Riba e pregunta si Eman ta haya cu cosnan ta bayendo den forma cu e ta desea el a contesta “Den tres aña bo no por cambia henter un sociedad, pero tur hende ta trahando cu hopi dinamismo. Nos a demostra cu por y cu e ta traha. P’esey nos ta mantene BoBario como base pa programanan di futuro”.